



07. november 2019

UKA 2019/211

Kalaallit qimmiata aammalu qimussersuartoqartarneratalu qanoq ililluni kulturikkut piujuartinneqarsinnaaneri pillugit Naalackersuisut misissueqqullugit peqquneqarnissaannik inatsisartut aalajangiiffigisassaatusiunnersuut. Susassaqartut peqatigalugit misissuineq ingerlanneqassaaq, misissuinerlu inatsisartunut agguanneqarumaarluni.

(Inatsisartuni ilaasortaq Doris J. Jensen, Siumut)

Siumumiit Inatsisartunut ilaasortap Siumoqatitta Doris J. Jensenip nunatta qimmiata piujuartinnissaa aammalu annertunerusumik atorneqarsinnaalernissaa pillugu inatsisartunut aalajangiiffigisassatusiunnersuuteqarneranut qutsavigiumavarput. Siumumiillu imaattumik oqaaseqarfigissavarput:

Qimusserneq kulturitoqqamik tammatsaaliuineruvoq, taamaattumik Siumup pigaartippaa qimussertartut kattuffiat suleqatigalugu qimussertarnerup tammatsaaliorneqarnerata sulissutigineqartuarnissaa. Soorluttaaqtamanna siunnersuuteqartup nassuiaateqarnermini ersersikkaa.

Qimmip qimuttup ukiuni kingullerni qamuterallannit annertuumik unammillerneqarnera miserratisaanngilaq. Taamaattumillu politikikkut nunatta qimmiata, qimmip qimuttup immikkuullarissuteqarluni inatsisitigit illersugaasup piujuartinnissaa anguniarlugu iliuuseqartariaqarneq killiffigaarput. Siumuminngaanniit Naalackersuisunut kaammattuutigissavarput Kalaallit qimmiat pillugu immikkut inatsiseqalernissapput piaartumik aammalu peqqissaartumik naammassiniaqqullugu.

Misissuinerit annertuut ingerlanneqartarput, nutaajunerpaarlu tassaagunarpoq oqaluttuarisaanermi suliniutaasimasuni anginerpaaq "qimmeq" tassani nunatta qimmiata immikkuullarissutaa aammalu kulturikkut inuussutissarsiornikkullu atorneqarnera pillugit misissuisoqarluni. Suliniutip inernissaatut siunertarineqartut pingaaruteqarluinnartut inuiaqatigiinnullu nunatta qimmianik illersuiuarnissaannut sinaakkusiunneqarsinnaasutut siunnersuutigineqartut timitalersornissaat siunertaralugu siunnersuuteqartup siunnersuutaanut kaputartuullugit suliarineqarnissaat Siumumiit inassutigissavarput.

Siumumiit ilanngullugu qimmeqarnerup qimussertarnerullu piujuaannartinneqarnissaat siunertaralugu sulinermut ilanngullugit makku eqqarsaatigeqqussavagut:

Siullermik qimmeqartut qimmeqarnerminni aningaasarpassuarmik ukiumut aningaasartuuteqartarput, inuussutissarsortuugunik imalt. Sunngiffiminni qimussertartuugunik.



Taamaammat Siumumiit pingaartipparput qimuttunik qimillit akileraartarnikkut ilanngaassiffiqartarsinnaanerat misissorneqassasoq.

Aappaattut Kalaallit Nunaanni Qimussertartut Kattuffiata aningaasanut inatsisikkoortumik aalajangersimasumik tapiiffiqartalernissaat naalackersuisut kattuffik peqatigalugu aqutissiuutissagaat.

Naggataatigut Siumumiit naqissuseqqissavarput ukiumoortumik avannaata qimussersuata aaqissuunneqartarnera tapersorsorluinnaratsigu. Taamaattumik isumaqarpugut misissuinnermut ilanngullugu qanoq pitsaanerpaamik ingerlanneqartarsinnaanersoq misissorneqartariaqartoq.

Taamak oqaaseqarluta Siumumiit siunnersuut kultureqarnermut ataatsimiitsitaliami aappassaaneerreqartinnani suliarineqarnissaa inassutigaarput, oqariartuutittalu ilanngullugit eqqartorneqarnissaat, pisariaqassappallu ataatsimiitsitaliap allannguutissatut siunnersuuteqarsinnaanera ammaffigaarput.

Jens Danielsen

Siumut